

De overeenkomst van 1463 m.b.t. het exploiteren van veen bij Hollandsche Rading

Wij domproesst, deken ende capittelen van den doem van Oudmunster ende Sinte Maryen kercken t Utrecht, wij commanduer ende t ghemeen convente van Sinte Kathrynen, ende lantcommandeur ende t ghemeen convente van den Duytschen Huse t Utrecht, wij abdisse ende t ghemeen convente van Oudwijck buten bij Utrecht, ende abdisse ende t ghemeen convente van Sinte Servaes t Utrecht ende wij lantgenoten van den Oestveen,

Van den twee oversten tyenhoeven daer die doemproesstye ende capittel van den doem voirges[creven] boven naest gelant ende gheleghen sijn met zesse viertellen veens [een viertel: hier mogelij vier morgen of bijna 3,5 hectare] ende Wouter van Catwijck mit vijf gherden [gaarde, roede, hier mogelij bijna 135 ha.) beneden naest ghelegen sijn, doen condt allen luden,

Dat wij eendrachteliken mit malcanderen overdragen sijn [overeengekomen sijn] dat men terstont mijntlick ende vryentlich [in goede harmonie] mit malcanderen opraden sellen die venen voirscreven ter Drynschoten toe, te weten dat men dat beghinnen sell boven in de helen veen ,

Ende so elck verlies yemant beneden in den voorseyden veen heeft, dat sell hij behouden, ende dat sell verloren bliven ter tijt toe dat men inden helen veen coemt, ende als men daer in coemt so sell elck comen tot sinen brede sins veens

Dats te verstaen dat elck veen breet wesen zell achtehalve gherde [gaarde] ende int verlies sel men nemen vanden ghevonden viertell viertels ghelijck ende baet baetsghelijck als dat behoert,

Ende so elck ghevonden blijft boven dat elck t siin heeft van den ghenomen dat sell bliven totten totten oversten tyenhoeven behoeff off hem tot enyghen tijdt enyge last aen gedronghen wordt, dat men dat yerst in daer off nemen soude, ende want dat die ghevonden off ghingen so dat elck siin brede niet houden en mochte

So selmen dat verlies mijntlick deylen ende verliesen baet baets ghelijck, ende tot wat tyden dese voirseyde ghenomen die gheen veenlanden en hadden inden voi seyden twee tyenhoeven off gheradet werden ende gheen veenlanden en behielden, so sellen sy vry wesen van allen slaghen ende schutten ende dien oncoste die hem voermaels werde the gelden, die zellen dese voirghenoemde twe tyenhoven ghemeenlick op hem nemen ende zelve ghelden

Ende waert dattet so gevaerde dat dese twe tyenhoeve voirghenoemdt boven off beneden van yemant aengedronghen off belast worden, als datmen haer kanten van haer veen voirseyt in dryngen off nemen woude, hoe off in wat schijn dat dat gheschiede, dat zellen wij mit malcander samentlijck wederstaen sonder enich weder segghen als goede buerlude ende helpen dat malcanderen houden in hare lengten ende breiden als dat behoert sonder argheliste.

In kennysen der waerheyt want wij dit eendrachteliken mit malcanderen overdraghen siin in allen manieren als hier voirscreven staet ende dat so mit malcanderen houden willen,

So hebben wij doempoesst onsen seghell, dekenen ende capyttelen voirscreven elx onsen voirseiden kercken seghelen ende wij com[m]e[n]duer ende ghemeen convente ende wij abdisse ende ghemeen convente voirghenoemde elx bijsonder ons convent segell uuthangende aen desen brief ghedaen over ons selven ende mede over die lantghenoten voirghenoemdt t enen oirkonde deser brieve siin zesse off meer alleens sprekende ghegheven int jaer ons Heren dusent vierhondert drye ende t sestick als t donredaghs na alre goede heylighen dach [3 november 1463.] [Transcriptie AD]